

Î crais qu' è portchaiyé (*profita*), po son étchappâle (*évasion*), d' ènne migrâchion de sâvaïdges oûjés. Â maitîn di dépaît è boté sai piaînnatte bîn en oûdre. È raîçhé (*ramona*) choïnïouj' ment ses vouldans en ambrûce (*activité*). È pochédait dous vouldans en ambrûce. Èt c' était bîn cmôde po étchâdaie lo ptét dédjunon di maitîn. È pochédait âchi ïn vouldan étôffè. Mains, cment qu' è diait, « An n' sait djmais ! » È raîçhé aidonc âchi l' vouldan étôffè. Ch' è sont bîn raîçhès, les vouldans breûlant saidg' ment èt rédyuyierment, sains botes-feû (*éruptions*). Les vouldaniques botes-feû sont cment des fûs de tiûé. Seutchiement (*évidemment*) tchu nôt' tiere nos sons brâment trop ptéts po raîçhaie nôs vouldans. Ç' ât po çoli qu' ès nos bèyant des moncés d' poïnne (*ennuis*).

Lo ptét prinçe airraitché âchi, aivô ïn pô d' grie (*mélancolie*), les dries djâchons (*pousses*) de baiobas. È craiyait ne djmais rveni. Mains totes ces faimiyieres bésaingnes yi pairéchainnent, ci maitîn-li, échtrém' ment réchâles (*douces*). Èt tiaïnd qu' èl airrôjé ïn drie cô lai çhoué, èt s' aïpparoyé è lai botaie en lai sôte dô son yôbe, è s' détieuvré l' envietaince de pûraie.

- Aidûe, qu' è dié en lai çhoué.

Mains èlle ne réponjé pe.

- Aidûe, qu' è rdié.

Lai çhoué teuch' né. Mains c' n' était p' è câse de son reûtchon.

- Î seus t' aïvu sotté, qu' èlle yi dié enfin. Î te dmainde poidjon. Taîtche d' être hèyerou.

È feut churpris poi l' aibcheinche de rpreutes. È dmoéré li tot dédjoéyie (*déconcerté*), l' yôbe en l' aîr. È n' compreniait p' çte piaïne (*calme*) douçou.

- Mains ô, i t' ainme, yi dié lai çhoué. Te n' en és ran saïvu, poi mai fâte. Çoli n' é piepe ènne ïmpoétchaince. Mains t' és t' aïvu âchi sot que moi. Taîtche d' être hèyerou... Léche ci yôbe aïpaîje (*tranquille*). Î n' en veus pus.

- Mains l' oûr...

- Î n' aî p' taint pris fraïd qu' çoli... L' oûr fraïd d' lai neût me fré di bîn. Î seus ènne çhoué.

- Mains les bêtes...

- È fât bîn qu' i suppoétcheuche dous ou bîn trâs tchnéyes (*chenilles*) ch' i veus coégnâtre les vouldés (*papillons*). È pairât que ç' ât chi bé. Chnon tiu me rendré envèllie (*visite*)? Te srés laïvi, toi. Tiaïnt és grôsses bêtes, i n' crains ran. Î aî mes gripes.

Èt èlle môtrait lierlainn' ment (*naïvement*) ses quaître épainnes. Èt peus èlle aidjouté :

- Ne trîinne pe cment çoli, ç' ât aïdiaichaint. T' és déchidè de païtchi. Vais-t-en.

Poéchqu' èlle ne vlait p' qu' è lai voiyeuche pûraie. C' était ènne çhoué taint ordïouse...